

Kuartet 4x100m wanita negara (dari kiri) Zaidatul Husniah, Komalam, Siti Fatima dan Shereen bersama pingat emas yang mereka raih, semalam.



Kuartet 4x100m wanita lakar kejayaan berganda

Atlet negara raih pingat emas sekali gus cipta rekod kebangsaan di Thailand

Oleh Mohd Khairie Khalid
khairie@bh.com.m

Kuala Lumpur

Kuartet 4x100 meter (m) wanita negara meraih pingat emas di Kejohanan Trek dan Padang Terbuka Thailand 2017 di Kompleks Sukan Universiti Thammasat, semalam.

Pelari negara yang diwakili Shereen Samson Vallabouy, Siti Fatima Mohamad, S Komalam Shally dan Zaidatul Husniah Zulkifli mencatat kepantasan 45.19 saat (s) sekali gus meleburkan rekod kebangsaan, 45.32s.

Rekod lama kebangsaan dicipta gandingan Siti Fatima, Zaidatul Husniah, Nurul Faizah Asma Mazlan dan S Komalam pada Terbuka Singapura di Kallang pada 28 April 2016.

Pingat perak menjadi milik

gandingan Thailand selepas mencatat 45.29s manakala gangsa dibawa pulang kuartet Singapura dengan kepantasan 45.65s.

Mengulas mengenai pencapaian di Thailand, jurulatih M Balamurugan berkata, atlet negara memberi persembahan yang baik selain berjaya mencipta rekod kebangsaan bahanru.

Kuartet lelaki raih gangsa

“Mereka memecahkan rekod kebangsaan, persembahan yang baik. Saya amat gembira dengan kejayaan ini. Saya pasti mereka akan dapat perbaiki kepantasan pada Sukan SEA Kuala Lumpur 2017 (KL2017), Ogos ini,” kata jurulatih itu kepada BH Sukan, semalam.

Kuartet 4x100m lelaki juga tidak mengecewakan apabila meraih pingat gangsa dengan catatan 40.02s.

Acara itu diwakili oleh Jonathan Nyepa, Badrul Hisyam Abdul Manap, Mohd Aqil Yassin dan Khairul Hafiz Jantan.

Pingat emas acara itu menjadi milik Thailand dengan kepantasan 39.54s manakala perak milik Hong Kong (39.84s).

Dalam acara 4x400m, kuartet Malaysia yang diwakili Tanalaksiumy Mahenthiran Rayer, Fatin Faqihah Mohd Yusof, Nurul Faizah Asma Mazlan dan Shereen Samson Vallabouy meraih pingat perak dengan catatan 3:48.52.

Emas dan gangsa acara itu milik gandingan Thailand masing-masing dengan catatan 3:43.42 dan 3:57.64.

Pasukan 4x400m lelaki pula sekadar menamatkan saingan di kedudukan keempat, untuk membolehkan Filipina meraih emas (3:11.42), perak oleh Thailand (3:12.06) manakala gangsa milik Korea Selatan (3:12.38).